

**MANDRIAMBERO. FILOHA RAVALOMANANA**

**“Hanova ny lalana hizoran’ny firenena isika amin’ity taona ity”**

Notanterahana tao amin’ny Espace SK Melody Mandriambero distrikan’Ambohidratrimo ny sabotsy teo, ny fifampiarahabana tratry ny taona nataon’ny Dis-TIM Ambohidratrimo. Tonga niatrika izany ny filoha nasionalin’ny antoko Marc Ravalomanana; ny depiote an’Ambohidratrimo Mamy Rabenirina, sy ireo depiote avy amin’ny antoko TIM, notarihan’ny filohan’ny Vondrona Parlemantera, ny depiote Fetra Ralambozafimbololona; ny avy amin’ny birao politika Jean Claude Rakotonirina sy Julien Andriamorasata, ireo ben’ny tanàna TIM ao amin’ity distrika ity.

Nambaran’ny filoha Marc Ravalomanana nandritra izany fa: “faly miarahaba antsika vahoaka rehetra aty Ambohidratrimo izay tonga maro anio. Ary mirary soa antsika rehetra amin’izao taona vaovao izao.

-Rehefa miresaka isika ny hoe taona 2023, dia taom-pifidianana no tonga ao an-tsaina, ren’ny sofina ary mahalasa ny eritreritra manontolo.

-larahan-mahalala ny fahavoazana sy ny fahantrana mianjady amin’ny Malagasy ka manjary very fanantenana izy ireo, satria dia maizina ny ho avin’ny firenena raha izao no mitohy.

-Hamafisina indray fa taona lehibe ahafahana manova ny lalana hizoran’ny firenena ity taona ity, ka ahafahana manangana ilay firenena vanona tadiavintsika. Izany anefa dia mitaky fandraisana andraikitra eo amin’ny tsirairay.

-Tsy afaka hiatrika fifidianana madio isika raha tsy manana lisi-pifidianana madio sy mangarahara ary feno ara-dalàna manaraka ny lalana mifehy ny tany sy ny firenena.

-Koa manentana anareo rehetra izay mbola tsy ao anaty lisi-pifidianana, mba hanatona ny Fokontany misy anareo tsirairay avy hanoratra anarana, hanamarina ihany koa raha efa ao ny anaranareo na tsia, satria zo fototra maha olom-pirenena vanona sy vonona ny



*Ny filoha Marc Ravalomanana tao amin’ny SK Melody Mandriambero.*

mifidy izay hitondra ny firenena.

-Tamin’ny 8 Martsa teo, izay andro maneran-tany ho an’ny zon’ny vehivavy, dia nikasa hanatanteraka izany fankalazana izany ny vehivavy TIM teto Analamanga, teo amin’ny Magro Behoririka kanefa dia feno mpitan-dro filaminana teny an-toerana nampihorohoro ary nakanana ny fidirana.

-Avelao hizotra am-pilaminana ny fanentanana ny vahoaka hisoratra anarana.

-Manameloka ny tsy fanajàna ny zon’ny mpianatra mitaky ny vatsimpianarany.

-Manameloka ny jadona sy ny fanaparam-pahefana atao amin’ny mpianatra.

-Mitaky ny fanomezana hasina ny fampianarana (mpampianatra, mpianatra, mpandraharaha).

-Mitaky ny fanatsaràna ny kalitaon’ny fampianarana.

-Mitaky ny hisian’ny fotodrafitr’asa ara-dalàna eny anivon’ny Oniversite rehetra eto Madagasikara.

**Nangonin’Isambilo**

Tontosa ihany ny fanamarihana ny 8 martsa

**Nahazo hery ny Vehivavy TIM Analamanga**

Nisy ny sakana natao tamin’ny vehivavy TIM Analamanga ny alarobia 8 martsa, andron’ny vehivavy maneran-tany. Tsy tontosa araka ny tokony ho izy ny fandaharam-potoana izay noeritreretin’ny mpikarakara tamin’izany, satria ny fotoam-bavaka izay zavadehibe tamin’ny vehivavy TIM Analamanga aza dia teo amin’ny arabe no notontosaina tamin’izany. Manoloana izany indrindra dia nisy ny fihaonana nataon’izy ireo tao amin’ny foiben-toeran’ny antoko TIM, tao Bel’Air Ampandran’ny sabotsy lasa teo, niarahana’ny rehetra nanohy ny fandaharam-potoana izay efa noeritreretina tamin’ny 8 martsa andron’ny vehi-



*Hetsiky ny Vehivavy TIM Analamanga tetsy Bel’Air.*

vavy manerantany. Fijoroana vavovolombelona sy fanomezana toromarika ho an’ireo vehivavy araka ny soratra masina, izay nentin’i Nenifara na Anna Andriamamonjy ao anatin’ny vondromba-

vaka. Ao anatin’izany ny toetra tokony hananan’ny vehivavy manoloana ny tokantranony sy ny firenena : « omeo vehivavy hendry aho hanorenako firenena vanona », araka ny ao anatin’ny soratra

masina. Rehefa vita izany dia teo ny niarahana nifaly niaraka tamin’ny mpanakanto mpanafana ny sehatra sy i Bodo nentina namalifaliana ireo renim-pianakaviana. Nahazo hery ny vehivavy TIM Analamanga, ka vonona izy ireo hametraka ny filoha Marc Ravalomanana hitantana ny firenena indray, izay latsaka ankaterena amin’izao fotoana. Tsy adino mihintsy hoy ny filoha ny vehivavy TIM Analamanga ny misoratra anarana ao anaty lisi-pifidianana amin’izao, satria mbola amin’ny faran’ny volana mey, no hifarana ny fanavaozana tanteraka ny lisitry ny mpi-fidy.

**Ny Valosoa**

DISTIM Andramasina

**Efa mivonona hiatrika ny fifidianana ho avy amin’ity taona ity**



*Ny sekretera jeneralin’ny antoko TIM tany Andramasina.*

Tsy diso anjara tamin’ny fifampiarahabana tratra ny Asaramanitra ny taombaovao koa, ny avy amin’ny antoko TIM any amin’ny distrikan’Andramasina faritra Analamanga. Ny sabotsy teo no natanterahana izany fifampiarahabana izany, izay notarihan’ny DISTIM any an-toerana, ary natrehana’ireo mpitarika ny antoko avy amin’ireo kaominina mandrafitra ity distrika ity. Niatrika ny fotoana ny birao politika, nahitana ny sekretera jeneraly Rina Randriamasinoro, sy ny mpandrina nasionaly Jean Claude Rakotonirina,

ny depiote voafidy tany an-toerana: Bina. Natao nandritra izany ny fifampiarahabana tratry ny taona, sy fanomezana toromarika mikasika ny fanomanana ny fifidianana ho avy amin’ity taona ity eto amintsika, ho an’ireo mpitarika ny COMTIM ao anatin’ny kaominina miisa 14 mandrafitra ny distrikan’Andramasina. Ankoatra izany, mitohy ny fanentanana ataon’ny DISTIM Andramasina ny olona hisoratra anarana amin’ny lisi-pifidianana, ho an’ny olona feno taona tokony hanatanteraka izany. **Niaina**

*Ny Valosoa sy faka-faka*

Fiainam-pirenena

**Lamasinina manadino ny vahoaka sahirana ny an-dry Rajoelina**

TGV=train à grande vitesse, manary ny olona sahirana fa toa tombontsoa ho an-dRajoelina sy ny ekipany amin’ny fihazakazahana amin’ny tsy rariny samy hafa eto amin’ny firenena ataon’izy ireo. Vao nahaino ny tenin-dRajoelina ny mpanara-baovao maro nanao hoe: soloina, alàna amin’ny toerany izay tsy maharaka dia gaga sy talanjona ihany, satria tena "Train à Grande Vitesse " marina tokoa ve ny zava-misy amin’izao fotoana?Misy ny mpiaramiasa aminy tsy maharaka, ny hita koa dia taraiaky ny vahoaka teratany, navelan’ny fitondrana ao anaty fahantrana lalina, tsy ahitan’ny fitondrana Rajoelina vahaolana.

Vahoaka sahirana, mahantra tsy ampy vola sy sakafo ho hanina no entiny, ka tsy mahita fahafahampo mihitsy tato anatin’izay 5 taona latsaka kely izay, na teo amin’ny ara-barotra, ara-tsosialy, tontolo iainana, fiaraha-monina, filaminam-bahoaka, sns... noho ny jadona sy velirano diso paika tanteraka ity. Lamasinina haingam-pandeha tokoa ity TGV hoy ireo sahirana, fa tsy lamasinina mitondra tombontsoa saha ny fari-piainan-draMalagasy ary mbola tsy mendrika eto amintsika raha bangoina tokana, satria raha ny fitaterana fotsiny dia mbola tsy nisy gara na lalamby, mba nanaovana fanatsarana sy fanorenana ara-dalàna akory. Mihazakazaka Rajoelina sy ny ekipany manonofinofy ka tsy tratra, ny hanaovana ny tanàna ho toy ny Parisy kely any Ambatondrazaka, ny teleferika, ny lalambe migodana, tetezana mihantona no mahamaika azy nefa ny lalana isaky ny renivohi-paritany, ny jiro sy rano, ny KERE, ny fihemorana any amin’ny farany, toa tsy tazany akory.

Tsorina fa raha mbola toy izao ny zava-misy dia mbola ho mafy noho ny mafy ny ho avintsika, ry zareo mpitondra sy mpisolalaka na mpanohana diso hevitra, no afaka migalabona hatrany, fa ny mahantra sy ny vahoaka sahirana dia ho noana eny hatrany, tsy maharaka ity "Train à Grande Vitesse " TGV ity, adinon’ity Train à Grande Vitesse ity.

**Beharo**

Depiote Todisoa

**Manampy ireo tanora ho amin’ny famokarana savony**

Mitohy hatrany ny asa sosialy sy fampandrosoana, izay tanterahan’ny depiote voafidy tamin’ny anaran’ny antoko TIM ao amin’ny Boriboritany faha-6, Todisoa Andriamampandry. Misy ny fampianarana manamboatra savony ho an’ny tanora sy ireo liana amin’izany, ka ny fokontany Ambohimanandry Ambohimanarina, no nanohizana ny fampianarana izany ny faran’ny heriandro teo. Ny mpampianatra dia Lalaina Rabezana-hary. Tanjona amin’izao hetsika izao dia ny mba hanampiana ny fidirambolan’ireo tanora, sy ireo vahoaka, indrindra amin’izao fiainana sarotra izao. Nankasitraka izao hetsika nataon’ity olom-boafidy ity izany, ireo mpahazo tombontsoa tamin’izany fiofanana izany. **Stefa**



*Fanofanana momba ny fanaovana savony, tao amin’ny Boriboritany faha-6.*